



BH ms 6 12/09/2019

# Larang pembakaran terbuka serta-merta

Arahan berkuat kuasa seluruh negara sehingga Monsun Barat Daya berakhir

**Putrajaya:** Susulan jerebu, seluruh negara diisytiharkan sebagai kawasan larangan pembakaran terbuka berkuat kuasa serta-merta sehingga Monsun Barat Daya berakhir.

Bagaimanapun, pengecualian diberikan bagi pembakaran mayat dan bagi tujuan keagamaan, gril/barbeku dan pembakaran gas mudah terbakar (flaring).

Ketua Pengarah Jabatan Alam Se-

kitar, Norlin Jaafar, mengeluarkan arahan larangan itu susulan keadaan jerebu yang melanda negara sejak Khamis lalu hingga kini.

Beliau berkata, larangan itu adalah bawah kuasa yang diperuntukkan kepada Ketua Pengarah Alam Sekitar mengikut Seksyen 29AA (2), Akta Kualiti Alam Sekeliling 1974.

“Semua pihak diminta tidak melakukan pembakaran terbuka atau membiarkan tanah atau premis kepunyaan mereka dimasuki atau dicerobohi oleh pihak tidak bertanggungjawab sehingga menyebabkan pembakaran terbuka untuk tujuan tertentu atau dengan tidak sengaja,” katanya dalam satu kenyataan, semalam.

Norlin berkata, mereka yang disabitkan kesalahan melakukan pembakaran terbuka boleh dike-

nakan denda tidak melebihi RM500,000 atau penjara tidak melebihi lima tahun atau kedua-duanya sekali.

Beliau berkata, kompaun maksimum sebanyak RM2,000 juga boleh dikenakan atas setiap kesalahan.

Katanya, orang ramai diminta memberi kerjasama untuk memadamkan kebakaran kecil serta membuat laporan kepada Jabatan Bomba dan Penyelamat Malaysia (JBPM) serta Jabatan Alam Sekitar (JAS) berhubung sebarang aktiviti pembakaran terbuka yang dikesan.

Orang ramai boleh menghubungi JAS melalui talian 03-88891972 atau 1-800-88-2727 dan JBPM menerusi talian 999 untuk melaporkan aktiviti pembakaran terbuka.

BERNAMA

## Menhadapi jerebu

1. Elakkan aktiviti fizikal di luar bangunan bagi mengurangkan pendedahan kepada jerebu.



2. Penganjuran membabitkan aktiviti fizikal di luar bangunan dinasihat ditangguhkan jika bacaan Indeks Pencemaran Udara (IPU) melebihi 100.



3. Banyakkan berada di dalam bangunan dan jika terpaksa berada di luar, gunakan penutup hidung dan mulut yang sesuai.



4. Tutup tingkap bagi mengurangkan asap jerebu masuk ke dalam rumah atau bangunan.



5. Elakkan aktiviti yang boleh meningkatkan pencemaran udara dalam rumah atau bangunan dengan tidak merokok dan sentiasa membersihkan persekitaran dalaman.



6. Guna pendingin hawa dengan memilih operasi (mode) kitaran udara dalaman semasa memandu kenderaan.



7. Banyakkan minum air kosong walaupun tidak terasa dahaga (sekurang-kurangnya lapan gelas sehari).



8. Jika mampu, pasang alat pendingin hawa dan penapis udara yang berkecekapan tinggi di rumah bagi menapis partikel halus.



9. Sentiasa awasi kesihatan anak kecil dan mereka yang menghidap penyakit respiratori dan jantung kerana mereka lebih mudah terjejas.



10. Dapatkan rawatan di fasiliti kesihatan terdekat jika tidak sihat.



Grafik BH